

BUSINA' ED CANTALUV

A tit la pupulasion cu i'é antervenì  
 du paroli d'introduzion suruma di,  
 a suma u solit grup ed squinternà  
 che, se ben i ricordi, l'ani pasà,  
 per sta sira, l'ava dac apuntament  
 a tit sta bela, brava e boina gent,  
 che cun entusiasmo in'ani fà  
 a s'era radunaia an tu salon dla Società  
 con la ferma intension ed rinuvé  
 la tradision dla Businà e del Carvé.

E sicume u mé smià davei capì  
 che a tit Cantaluv u i'ava fac piasi  
 ed trascuri i na sira an alegreia  
 divertinsi e pensier aveini meia,  
 u mé manc rasà per la ment  
 ed deludi tit sta brava gent,  
 ed boina meina as suma dac da fé  
 per sti du o tre bali pudei rimé  
 cercanda ed ponsi, senza fé crié,  
 cercanda per na sira ed fé smentié  
 el presi del furmag da graté,  
 l'una tantum, el tasi, el supertasi,  
 i tuten chi van an tel meliasi,  
 l'aument del gasolio e del carbon  
 che el Guvern, an sima del grupon,  
 tic i di el cuntinua a fes caschè  
 cun la schisa, l'Italia, duvai salvé.

Se ben i ricordi, l'ani pasà  
 a i'avu cercà d'esi abastansa equilibrà  
 per nenta rischié d'andé a svigé  
 el vespi chi drumivu an tel vespé,  
 e perciò, anche st'ani, evituma ed parlé  
 di mari che a la dona i corni i fan purté  
 e ed cul doni che is son faci l'amisen  
 perché, del mari, i tibu i n'avu pen,  
 du rest, i son nenta nuvità  
 e tit el pais sens'ater ui sà,  
 ades poi che l'Anselmi a m'ha eguaglià  
 anche chic corni ed pl, u rientra an legalità  
 anche se chicaden, a di la verità  
 u duvrà sbases, per pudei entré an cà.

Ma prima ed parlé del nuvità  
 du paroli an sel Carvé ed l'an pasà  
 che tit Cantaluv, la vist mascherà  
 dai veg ai giuvu, dal doni al masnà.  
 A u dop mesdi ed coriandoli la barnà  
 i'an fac per el pais el masnà

cun an testa i na nostra cumuscensa  
 che pochi u na fà, ma tanti u na pensa  
 e che mai cme a Carvé, u sé truà a pan  
 tninda per tit u di, l'autoparlante an man.  
 A la sira poi, an tla Società  
 ai stavu manc pì, tant ch'ieru gnacà,  
 chi, cun sgargiant custim, u s'era mascherà  
 chi, ed teila ed sac, u s'era cuntentà.  
 Ien, che da mummia, u s'era ausì bendé  
 ben prestu, dan sel bal, la duvì scapé  
 perché, cmensandsi, el bendi a smulé,  
 bel e biet, u rischiava ed resté.

Uribil mascheri, chicaden l'ausì bité,  
 con l'intension, la gent ed spaventé  
 anche se u riusciva mei an tu so intent  
 se la maschera us bitava nent.  
 E l'é andacia ben che rumpinda la pignata  
 a chicaden us seia nent rumpì la facia,  
 Renato, el fava la part du lion  
 a tit el doni, ui dava an man el baston  
 e cun la schisa, el doni, ed bendé  
 u cercava la manera ed pudei tuché.

Ades lasuma perdi el Carvé ed l'ani pasà  
 e dumsì da fé a serche el nuvità  
 cmensanda da cul bel grup che a st'istà  
 l'ausì, fin an Russia, fé i na puntà,  
 baldansus, an cun l'aereo, i'an ausì andé  
 ma apena an sima i'an cmensà a tremé  
 i strensivu cui pasava manc pì in aghigen  
 ed midandi, i n'an ampì in sisten,  
 ien po, apena l'aereo lé planà  
 lé curs a l'albergo e per trei di lé stac sarà  
 l'efet del vul, chisà perché  
 fina el mucoidi u i'ava fac gunfié.  
 Apena poi i son rivà a cà  
 el bar ed Maria i'an sibat sbancà  
 perché ed bibite e ed café  
 dla gran bigina i'avu duvì fé.  
 E poi per quendes di, an tic i canton  
 i'an tni banco con el discusion  
 spieganda a i'amis, cul che an ses di  
 del viagi an Russia i'avu vist e senti  
 ma forse i'an fac an pò ed cunfision  
 spieganda i sistema ed cula Nasion  
 perché chicaden la poi finì ed capì  
 el cuntrari ed cul ch'iaurivu di.

Duma i n'ugià an ti noster quat canton  
 per dé nà cuntrulà al nostri asuciasion  
 da culi chi son cresci ed dimension  
 a culi, che, anveci, i son finii an tel carbon.E  
 Ed cui dl'Union Spurtivaper prim auruma parlé  
 perché i son gent che is dan in gran da fé  
 i son semp an muviment, u i'é nenta da di  
 i taiu fina l'aria cun el ciapi del chi

anche se per fé, mi chi voru, bela fighira  
 ui manca, quasi semp, 19 sold per fé na lira.  
 An cun l'ait ed tit la pupulasion  
 i'an cambià el mur al camp da balon,  
 andò che per tanc ani, tit la burgà,  
 la scarià la roba marsa cl'ava an cà,  
 ades u i'é in bel campet illuminà  
 donda chi giogu tit el noster masnà,  
 e cula che prima na bogia d'acqua marsa l'era  
 (lé andacia ben su i'é nent scupia el culera)  
 ades i na gran bela peschera a l'é  
 e la gent, d'istà, a l'ombra la va a pesché,  
 a u di ed dla festa el troti andrenta i'an bità  
 e i na bela gara i'an urganisà  
 e Nizzi, per nent smentis, ancur prima ed cmensé  
 du bel troti l'era sa ruscì a bracuné.

E parluma an pò ed cul bel element  
 che dl'Union spurtiva el fa el President  
 "fuma ecunomia, ed spendi l'é nenta el mument"  
 quandi cus parla ed sold, lì, ui sent nent.  
 Casie poi a st'ani, i'an bità ien  
 che per ranchei i sold, us dev pié per el criuaten  
 e i giugadur el cuntinua a fé risiè  
 perché la benzina ui vò nenta rimbursè  
 ades u smeia che, semp per risparmiè  
 i giugadur, bei e scus, el voia fé giughé.  
 Ui na i'é poi ien an tel consiglio dl'Union  
 che u dacquarò, el fa ed profesion,  
 d'invern u siua, d'istà el bagna,  
 an sel camp da balon, la truà la cucagna!  
 U i'é poi in element, che gavti dan mira,  
 us po mai savei che aria cla tira,  
 a l'é in tipu da pié cun el molí  
 perché, d'ogni tant, ui gira el toli  
 e a parlei ansema, quandi cl'é anrabià  
 in para ed bisi, u i'é semp da purté a cà!  
 E per pudei dé a Cesare cul che ed Cesare a l'é  
 l'autoparlante an man a ien lasumii stè  
 tantu pì, che an ti si ucasion  
 a l'é ien cus dà da fé dabon.  
 In ater che anveci, el President el fà sagrinè  
 l'é cul che con l'arbitro, el vò seper risiè  
 e dan sima la bancheina, quasi semp  
 us fà mandé fora prim du temp.  
 Sbandieratur uficial dla società  
 lé ien che la bandiera u ten cme i na mistà  
 el porta a spas per el camp u so panson  
 el fima, u risia, us s'ieusa la presion,  
 e quandi cu s'anrabeia el va an tel caudren  
 u sbandiera che el balon a lé sà an tl'ort ed Paulen!  
 U i'é poi doi o trei bei facion  
 che an sel camp, i fan la guardia ai purton  
 i fan la guardia cme di can masten  
 ai vorì pasé, i devì fé l'inchen!  
 U i'é poi in grup, boia faus, semper a dre a serché  
 la manera, suta i denc, cui cos bitè  
 ma duvuma ricunesi, e fei tant ed capé  
 che is tiru mai andrè quandi cl'é ura ed paghè.

Alenatur, a st'ani, i'an truà ien  
 che el ven da in pais chi avsen  
 da i giugadur us fà rispeté, niente da il  
 e ui fà di tibu che in finisu pì  
 da la bancheina, bras e lengua el cuntinua a fé andè  
 tant che fin dal Casceini Bianchi il sentu a crié.

Ades che del balon fin trop longa a l'uma tiraia  
 fuma in saut an tla Società Uperaia  
 donda u temp el fà brit e bon  
 el President, Renato Taton.  
 Diuna sibit che an tl'an cu i'é pasà  
 cui cos ed bon i'an fac anche an tla Società,  
 i'an fac i na gran bela pulisseia  
 e d'armenta, in tumaré i n'an purtà veia  
 el miraii, ed bianc i'an culurà  
 el porti e el fnestri i'an culurà,  
 ma malgrad u sò des da fé e da di  
 la gent, a u di dla festa, poc la rispundi  
 e se anche i'avu pià del bon urchestri  
 tropa gent lé armasa a uardè dal fnestri,  
 "Cantuma Lisandria" con sacrifici i'an anvidà  
 ma la gent la preferì stei a senti dan sla strà,  
 e cui che po u i'era andrenta, i'an capì ben poc  
 is uardavu an gir chi smiavu tic aloc  
 perché gavandai veneti, i ruman e i maruchen  
 i'armanivu ben poic cui chi capivu u lisandren.

Un fa na rabia, a noi ed mes età  
 pensé a quandì, poc pì che masnà  
 d'invern antré, la duminica a i'uma pasà,  
 balanda, an tu salon dla Società,  
 i sunadur, se ben i ricordi, i'annivu da Bren,  
 i rivavu an sin birocc, tirà da in asnen,  
 is ciamavu "Calan", e ansima du lugion  
 i sidavu e i stunavu cme tanc cravon,  
 ma noi as divertivu, perché l'era l'unica ucasion  
 che cun el murusetti, a i'avu ed des in strenson,  
 e quandì, el luci, i sa sbasavu ed ton  
 as davu, magari, in basen ed scapaton  
 cun tit el mari, che an sel bancheini, drici an pé  
 i favu la guardia cme tanc carabinieri.

Ades lasuma perdi la malinconia e da la Società  
 fuma doi pas per traversé la strà,  
 a rivuma sibit an tel Bar Paradis  
 donda cu i'é i na gran brancà d'amis.  
 A trovuma sibit set o ot patì  
 chi fan u tifu per i partì  
 e i son cunvint, che an tel discusion  
 el basta crié fort per pudei avei rason.  
 U i'é po, dla brisca, la solita taurà  
 che an sing i giogu; con el cutè piantà  
 i fan del discusion che in finisu pì  
 con sing carameli i fan pasé tit u di  
 e chicaden u rischia ed sciupè  
 perché la vincita el cuntinua a mangé  
 chic ater, anveci, per risparmié  
 el carameli el fa riciclé.

Ui manca nent cui doi o trei puncen  
 che pì firb che i'ater, i voru semp esi in cicinen  
 e che, an qualsiasi discusion  
 i pretendu semp d'avei rason  
 e lé tantu tanta la so cunvinsion  
 che se i cuntradisi, iv dan del gripion!  
 Del bigliard u titul ed campion  
 lé semper an palio tra Gino e u Taton  
 i son tic doi cunvint ed esi "el pì bon"  
 che i van an gara anche a fé i sbrufon  
 quand chi giogu, ien lé rus che el peia fò  
 l'ater anveci, lé bian cme in lansò  
 e quandi chi perdu, i la peiu tant a mà  
 che per na smaina in sortu pì da cà.  
 Gino, gagliot, per diversi dì  
 a u so avversari la sciaparà ben ben el chi  
 tant che u Taton, dal magon d'avei perdi  
 ed noc un riusciva manc pì a drumì!  
 Al Paradis u i'é quasi semp ed cà  
 ien che di gran manifest el fà,  
 del gran matiti la sà cunsimà  
 di gran foi, al miraii, la tacà  
 tant che an tel bar, a l'unaminità  
 re del manifest, i l'an batzà,  
 ades però, a lé an pò an decadensa  
 per via dla spietaia concurensa  
 che ansema a Bianco, Carlo Ricagnen  
 ui fà d'istà, dan sel pont ed Mainen.

Inultrumsi an tla chirva e fermumsi a uardé  
 i negosi di noster car butiè  
 che da la pau ed vansé poca paia  
 i vendu la roba u triplu ed cul ca i'é custaia  
 e cantanda miseria, tic is son sa vansà  
 l'alog an riviera, an muntagna o an sità,  
 a uardanda i presi che an vedreina u i'é  
 sibit, i cavì an testa, iv senti andrisé,  
 e se a crumpé, i'ei meia ed biet rus, i son d'ulur  
 del furmag da graté, i porti manc pì a cà l'udur!

Ades che an sla piassa dla gesia a i'uma bità i pè  
 per ansen mutiv, auruma girè andrè  
 anche chi ficuma u nas, per vighi sic i'an cumbinà  
 da quandi el paruchial consiglio la deliberà  
 che cun l'ait ed la pupulasion  
 a la cà ed la parochia, us duviva cambié i mon,  
 el basta, an tla curt, dé an gir in'ugià  
 per vighi i lavù sa ben ben avansà,  
 anche se ultimament, is son an pò arenà  
 perché, u smeia, la materia prima ui seia mancà,  
 e ch'iatu decis ed spicé el bon cor ed la gent  
 per pudei, l'opera, purté a cumpiment.

Caminanda per la nostra strà  
 da dnan a in edifiçi a suma rivà  
 donda, quandi ca i'eru masnà  
 tic noi, l'abici, a i'uma amparà,

a uardansi an gir, cun circuspesion  
 da la pau, che an testa, um casca el curraison  
 sibat, da dnan a i'og, um ven doi bei puntal  
 che la nostra cara aministrasion comunel  
 per pudei, el purten del scoli, teni si  
 con gran sacrifici, u m'ha elargi.  
 E da sà che l'aministrasion comunel,  
 senza aurei, a i'uma tirà an bal,  
 senza aurei l'aria d'aurei criticché  
 um ven, seduta stante, da pensé,  
 che se anche d'aministratur  
 a n'uma avì tanc, e ed tanc culur,  
 a suma ancora chi, a uardesi an tel mur  
 senza u noster suspirà sulevatur!

Ades che da la maslereia a suma rivà  
 giruma andré i talon sgagià  
 e Via dla Pace lasumla sté  
 che tant lé na via ca i'uma semp temp a piè,  
 traversuma la piassa cl'era na vota d'ierbas  
 e che ades anveci, lé la piassa di priss,  
 ma ca finiruma ed duveila ciamè  
 la piassa andonda cus brisa Carvè.  
 Custegianda la tenuta ed Ramugnen  
 e i cup ratà du deposit ed Pidrulen  
 a rivuma da dnan in campet da balon  
 cl'é na speina an tel cor per Luigi Brugnon,  
 e per u Taton, che da la fnestra, lé tit in ducé  
 cui che dal campet, ai pivion, i van a sparè  
 e che d'ogni tant, u dà fora tit ancasà  
 perché, cui balen, la grundaia i'an crivlà!

Rivà a suma an tla stansia del discusion  
 che, per chi cul sa nent, lé la Delegasion  
 donda, trionf, in para d'ani fà  
 el Consiglio ed Quartié u s'era ansedià,  
 ma che dop i prim lamp, e dop a tant trunè  
 la cmensà a fé acqua senza pì stralascè,  
 anche, se per dè la verità  
 l'impign ed chicaden lé nent mancà,  
 che ancora ades, us dà in gran da fè  
 per pudei, la facia, almenu salvé.

Fuma ades in saut an tel bar ed Marisa  
 donda se poic i troui con la testa grisa,  
 dla gioventù u i'é tit el fiur fiur  
 che an tel pais el va per la magiur,  
 an sima du giubox, i son semper stravacà  
 per senti, di discu, el ultim nuvità,  
 ancontra al porti, i son semper rambà  
 che se mai uv ven an ment d'andé da dlà  
 tre voti, permes, uv tuca ciamè  
 senza, per niente, riesi a fei spustè,  
 tant che se propi, da dlà, i vori andè  
 an sima di pè, ii devi munté.

U i'é poi in grup ed bel masnà  
che ansema ai fiò nenta ambranà  
i pasu la sira a disputé  
per stabillì donda chi devu andé a balé,  
ma l'acordi i trovu mai, e an sel pì bel  
i fiò i van a la Cometa, el fii a u Lavagel,  
ades però, a u Lavagel a balé  
u i'é pì ansen che el voia andé  
perché an cui paragi ui gira del mongi  
chi fregu el machini e iv mandu a cà a ongi  
mi cu i'é capità a in grup ed bel masnà,  
i na sira ed trei o quat meis fà  
che la machina, a lé vei che pò i'an trua  
ma u l'indman, bela biuta, an tna scarpà!

U i'é pò in grup ed bei pivlen  
che, al Palladium, i van a purté i limen,  
is trou semp a l'imbuc del vial dla stasion  
e, per del i'uri, i fan andé u didon  
sercanda, cun in pasagi, ed risparmiè  
i sold per pudei an sel bal entré.  
Beata gioventù, an lasev nenta smunté  
e pensè che na votà, per andé a balé  
anche sa i'eru giuvu e bei  
an sim dna bicicletta, as carjavu an tra trei  
e an sel bal, entravu semp dop la mesanoc  
perché an sacocia, a i'avu amà di piog!

Ades, prima del bar ed Marisa duvei lasè  
cun i giuvu, du paroli, auruma ancora fé  
perché anche si sercu d'esi strafutent  
i dan l'impresion d'esi mai cuntent,  
e i son semper a drera a protestè  
cme, se di gran tort, i'eisu semp da fè,  
e, se i permeti, in consiglio a v'auruma dé  
perché, anche s'iei tit, i cuntinui a protestè,  
fermev in mument, e pruvé a pensè  
a tit cul ch'ian d'uvì rinuncé  
cui che trant'ani fà, i'avu i voster di  
e che ades, purtrop, giuvu in son pì,  
l'era festa per lur, quandi chi purtavu i sucon  
ades i'ei di stivalen cun quat dia ed talon,  
na vota i giravu cun del ciapi an tel chi  
ch'ieru pì grosi che tit el vesti  
ades da la testa ai pé i sei arpulì  
i nasci sa cun u scuter suta al chi  
e per scaudevi, i'ei nent damsogn del gripion  
perché, an cà, i'ei pront i termusifon,  
e se dop avei pensà, iv trovi ancur scuntent  
sté da senti me, e dem da ment  
pruvé, na vota, dai voster pari fev chinté  
quandi, temp ed guera, per pudeisi scaudè  
i davu ed noc, l'assaut ai vagon  
per rimedié in sac ed carbon  
anche se alura, i'era sà chì, senza rischié  
el pericul, magari ed fes sparé  
standa da dre, ben nascundi  
el fregava i sac, ché i'ater i'avu ampi!

Andanda per el burg, pasuma da dnan a la cà  
 d'in fursarò, tantu furtinà  
 che tit Cantaluv, per turluri  
 la vò semper andé ansema a lì,  
 da quandi, an suma nenta si l'ei savì,  
 ansema a Colino, andanda in di  
 per fons an ti noster prà,  
 na brancà ed desmila, la truà!

Giruma ades anturn a la cà ed Muleina  
 e ancaminusi per cula stradeina,  
 che con quat pas, an piasa dla Stasion,  
 an porta da dnan a cula asuciasion  
 che poc temp fà, an tu gir d'in sul istà  
 l'ava raggiunt el masim ed la notorietà,  
 ma che tit an t'in culp, a sé ansetaia  
 tant, che ades, lé quasi abandunaia,  
 e tit lé cmensà, da cul ca i'uma capì  
 da quandi, Carlo, i tibu u sé ampli  
 e u sé stufà, da chicaden, sentis a di  
 cui dava fastidi l'udur du rusti,  
 e rifletinda, in dubi, un ven an tla ment  
 cl'aba nent capì, chic dirigent  
 che l'udur du rusti, l'era u sul muvent  
 ch'el portava a la baraca tanta gent.  
 Ma vist che i dirigent i son d'iamison  
 che, si voru, a cumbiné i son bon  
 a pensuma ch'is laseran nenta smunté  
 e la crisi, i savran, ben prestu superé,  
 as l'auguruma ed cor, anche perché  
 a la cursa del prim mag, auruma nenta rinuncié!

Cun an testa i na capleina da mesican  
 semper alegher, cun la chitara an man,  
 an tla baraca, rambà an t'in canton  
 a truuma in noster car amison  
 a dre a stidié, sfuianda el margheriten,  
 s'la da cmandé i na tasa o trei grapen,  
 e che quasi tit el siri, porca la vaca  
 la và a finì, che d'ven, fin da i'og u stravaca,  
 e che el fà del serenati andanda a cà  
 chi fan scapé fina i gat dan sla strà!

E se i tuten i son andac an tel meliasi,  
 a chicaden, per via del tasi,  
 el meliasi i son andaci an ti tuten  
 per cui, che na vota, i stempavu u giornalen,  
 e che dop avei raggiunt i na certa tiratira  
 fanda, a cui del balon, la caricatira,  
 apena l'argument i'an esaurì  
 i son armas senza savei se di  
 tant che senza fé na piega, per ferie i'an sarà  
 e a piesli an cul pais, tic quant i m'an mandà,  
 e se, putacas, du giornalen  
 ui fisa tra voi chicaden  
 che el vò lesni ancora in'edision  
 u òvrà spicé fina al prosim elezion!



A st'ani per caciadur e pescadur  
 a quanto pare, i son stac dudur,  
 i'an girà tant, ma cme tanc aloc  
 a cà, i rivavu, semper cun ben poc.  
 I noster caciadur che in og ed dla testa,  
 cunvin a tit el lever ed fai la festa,  
 i'avu spendì, cuntent cme gril  
 per crumpé el can cul pitigril,  
 i'an capì ben prestu, che segugi e spinon  
 i'eru nentater che can da paion  
 ma, per nenta smuntà, i noster caciadur  
 dal fatto d'avei, per can, di brentadur,  
 anche se lever e fasan, poich i n'an ciapà,  
 galeini e faracini, oh si n'an spinà!

U i'e po ien che an tla venatoria l'ausì entré  
 per pudei, a i'amis bracunié, la caccia dè,  
 us pudiva trué, pistola an tla fundeina,  
 dal Casceini Bianchi o da la Muscheina,  
 ma anche se di e noc, la cuntinuà a gatuné  
 i bracunié, el lever, i'an nent rinuncià a ciapè  
 e cun el lever, is son fac i'anruten  
 e a l'amis, per cus fasa in bruden,  
 malign, an sima del cancel  
 i'an tacà, dla lever, i'os e la pel!

I pescadur mai cme a st'ani i son stac scarsen  
 i rivavu a cà che semp voi i'avu u reiden  
 e anche se an tla pulenta i bitavu u rusmaren  
 i'an ciapà tant sù, ma pes mai nen,  
 e senza cul bel carpi pensulon dal muturen  
 u rivava a cà, tit el siri; el pustinen  
 tant che in di, u sé tantu stufà  
 che fina la barca, sut'acqua la mandà,  
 la decis ed pì posché, e tit ancasà  
 la cana cun u sciop la baratà,  
 ma anche se a caccia, la fac in gran sparé  
 dla gran aria, u sé vansà ed crivlé  
 e quandi, ben prestu, ed sparé lé dventà sbrons  
 la pusà anche u sciop, per andé per fons!

I noster fonsarò pì rinumà  
 per pudei pì tanc fons purté a cà,  
 cunvint, e lé nent sul la so upinion  
 che el doni, per el capeli, i'og i'an bon,  
 a st'ani is son ausì purté a dré  
 an sel muntagni, per fons, la muiè,  
 ma ancora prima an tel bosc d'entré  
 el doni i'avu sa pau, la vipera ed trué  
 e tantu i'eru spaventaii, ch'el bastava in nent  
 avghinda in lambris, fel dventé in serpent  
 e chicadeina tant a l'era usesiunaia  
 cla fini, che an tel braii, a sé pisaia.  
 A i'usa tirà a sciupé, arlinda a crepapel  
 quandi Vanda, in di an su Sasel  
 anquaciandesi; per bité in fons an tla cavagna  
 la pusà i na ciapa an s'in ris ed castagna  
 e spaventaia a sé bitaia a crié: curi, curi  
 che la vipera a ma murdi an tna ciapa ed chi!

Centaluv, a i'uma l'impresion  
 cu seia dventà, el pais di pianson  
 e che i poich chi tiru meia ed lament  
 i seiu armas cui ch'ian mai avè nent.  
 Però a pensandii ansima' in mument  
 a i'uma l'impresion che certa gent,  
 cla cuntinua a piansi tit u di  
 la staga piandmi ben ben per el chi,  
 vist che tiranda di gran lament  
 i riesu a fes i'apartament,  
 e che gavà cui doi o trei piog  
 che, si pudisu, in uardù manc per scansé i'og,  
 i pì tanc, piansinda, i sercu ed trué  
 la manera la sà, ed nenta paghé!

Ades si permeti, auruma di  
 du paroli ai noster amis del Picì  
 che anche a st'ani, an sel camp da balon  
 i'an ausi fé, el Festival ed l'Union,  
 e che anche s'ieru ben urganisà  
 i'an fini ed trues an difficoltà  
 quandi tanta gent la cmensà a rivé  
 e, a tic i cust, l'auriva mangè,  
 e l'ava tanta ed cula fam aretraia  
 che, sla pudiva, la mangiava fin la tuaia,  
 e ben prestu, Solferino, da sul lé pì bastà  
 per garanti, a tanta gent, salamen brisà,  
 e lé finia che i'ultim rivà  
 a gaves la fam, i'an duvè andé a cà.

E parluma del doni mariaii e da marié  
 che, anche a st'ani, al balon is son ausii sfidè  
 con gran delisia ed tic cui spetatur  
 chi criavu cme tanc gat a l'amur,  
 is son daci in gran da fé, niente da di  
 e a la fen, el mariaii i'an vensi  
 anche se el piveli, i'an avè cui cos da di  
 per via d'in gol ch'iavu fac con el chi!

Du paroli anche per cula manifestasion  
 che a st'ani, a la sò prima edision  
 la vist quasi tit la pupulasion  
 ampegnaia a difendi u sò rion.  
 Trofeo, cupi, cupetti e midaien  
 l'ava bità an palio Beppe Rosen  
 e tic i campion, i'ambranà, i sciapen e i sucon  
 is son dac da fé per fé vensi u sò rion,  
 a i'uma pudì vighi i campion ed la bucià  
 e cui, che anveci, i tacavu manc an tna cà,  
 da cui che an tla peschera i'an ausi triblé  
 tentanda, cun du cani ed peschè,  
 a cui che, cunvint, che i pes i'eisu da vulé  
 an sel piantì i cuntinuavu a lancé,  
 e an tla marcia, gavà doi o trei gasà  
 chi son rivà da u Silos, poi i'an perdi la atrà,  
 anche se con manc pì in fil ed fià  
 tic, prestu o tardì, i son rivà,  
 la fac el voi, an tla marcia, Berela  
 danda mes gir ed distac fin a sò surela,  
 e tic chi ad fora, an sla vista da bal

a i'uma asisti al gran final  
 cla vist l'Uratori u Trofeo cunquisté  
 e i'ater rion vances ed ciché!

A cui che a la festa i'urganisu el manifestasion  
 un so ca digu chi son di luc dabon  
 a st'ani, pì savinda, che cosa andé a stidiè  
 el doni con i'omi an su tandem i'an fac andé,  
 i son sciupà da u reii i spetatur  
 e per Maria i son sibat stac culur  
 perché Giusep, cl'era partì come na sciuptà  
 sibat, la surela, dan sla sela la scarià  
 e Maria, an tel parafanghi, bela anganciaia  
 la curs el pericol d'armani capunaia.  
 El doni an tna specialità  
 i'an dimustrà tit la sò abilità  
 e a i'om i'an fac ammi i guton  
 tiranda el bali an ti tulon.  
 E Rosanna che la testa du Sergion  
 l'ava, forse, scambià per in balon,  
 a sparanda an con la carabeina  
 a i'a fac in bel bog an tla capleina,  
 e Fabrizio, set camisi la duvì sidé  
 per, la Piera, per tit el camp rastlé,  
 e sul a la fen, lé riuscì a capì  
 che la Piera, an sla sela, l'ava mai pusà el chi!

Ades a lé ura ca decídu ed stralassè  
 per pudei, per natr'ani, cui cos vassè  
 na prima ed lassè, sgagià, sgagià  
 duma ancora an gir, in para ed masà  
 emensenda da cul che u distret,  
 poc temp fà, l'ausì mandé a baiet  
 anche se per tit l'ani u s'era vantà  
 cl'ava truà la manera ed nenta fé u suldà.  
 Sercuma ed nenta lassé andré el Picion  
 che da quandi ch'ian regalà i scarpon  
 tit el duminichi el vò andé  
 an sima del muntagni a scié,  
 lé curvint d'esi bon, e ul cuntinua a di,  
 ma la verità, lé che el ven sù cun el chi  
 e a Luigi Buca, u i'é sa ammi el fiaton  
 a forsa ed tirel sù dan ti rion.

A u lunedì, i na squadra ed gadanon  
 a l'Alessandrino la vè a purté i talon  
 cercanda la manera ed sghires la vista  
 con el balereini ed la rivista  
 e i rivu a cà, cu smeia ch'iabu vist i piog  
 tant, dan tla testa, ui sort fora i'og!  
 Tra i noster particular, u i'é in tal  
 che a st'ani la fac, in racolt ecesiunal  
 pensé, che se anche ed tera, u na mai avì  
 otanta quintal ed melia la batì!

Ades speranda che ansen us seia ufendì  
 as pì tant che in ater a l'uma pansi,  
 tic ansema a ciamuma perdon  
 che, d'ufendì, a n'avu nenta l'intension,  
 vist che la nostra sula ambision  
 lé cula del Carvé cuntimé la tradision  
 e an tel medesim temp dé in pason  
 a cul du o tre asuciasion  
 che per vivi nent'ater i poru fé  
 che fé el mur bon, e cuntinuè a ciamé,  
 e per sti motiv, a s'auguruma che  
 ansen l'aba da tires andrè  
 e che tic, per ricord, i vorì purté a cà  
 i na copia ed la businà.

Ades a lé d'oblig fé in gros ringrasiament  
 a tit sta brava e boina gent,  
 da tic cui cu i'é antervenì  
 a cui che standa a cà, in san nent si ch'ian perdi,  
 a tic cui chis son ammascherà  
 a cui che la vestimenta nova i'an bità,  
 da cui che a Carvé i'an dac fò  
 al pastisé cla fac i farsò,  
 da cul cla scric la businà  
 a cul che tit el copii la stampà,  
 a tic cui che, ben o mà, i'an contribui  
 a fem truè tic ansema, sta sira chì,  
 e perché sta sira as deva nenta smentié  
 e perché tit l'ani iv la posi ricordè  
 tic ansema as bituma a crié  
 viva, viva, viva Carvé!

F I N E